



**Äntwert vum Här Minister fir sozial Sécherheet op d'parlamentaresch Fro n°7220 vum 22. November 2022 vum honorabelen Deputéierten Här Sven Clement iwwert d'onbezuelte Kotisatiounen**

Betreffend d'Sozialkotiatioune gëtt et en Ënnerscheid an der Deklaratioun tëschen engem Employeur an enger Persoun déi fir sech selwer schafft (Selbststännegen). Den Employeur muss all Mount d'Salairë beim Centre commun de la sécurité sociale (CCSS) deklaréieren. D'Sozialversécherungsbeitrëg ginn dann op Basis vun deenen Deklaratioune gerechent. Dës Donnéeë stinn dem Employeur selwer zur Verfügung deen d'Sozialversécherungsbeitrëg direkt vum Salaire ofrechent.

E Selbststännegen huet dës Pflicht net. Donnéeë vum Revenu krit de CCSS vun der Steierverwaltung, dës op Basis vum Artikel 427 vum Code vun der sozialer sécherheet (CSS). Allerdéngs kann e Selbststännegen säi Revenu selwer beim CCSS ugi fir dat d'Sozialversécherungsbeitrëg op dee Revenu gerechent gi bis dat den definitive Revenu virläit. Dëst ass wichteg wann de Revenu net iwwer d'Joren konstant ass, mee vu Joer ze Joer variéiert. Doduerch kënnen dann d'Sozialversécherungsbeitrëg och méi zäitno ugepasst ginn.

Betreffend d'Bezuelen an de Recouvrement vun de Scholden, ass ze bemierken datt et keen direkte Lien gëtt tëscht dem Decompte vum CCSS op Basis vun enger Deklaratioun vun der Steierverwaltung (ACD) an dem Recouvrement vun de Scholden duerch e Gerichtsvollzéier.

Den Artikel 427, Alinea 1 vum CSS gesäit vir:

« [...] Les indications nécessaires pour la constatation et la fixation des activités non salariées même exercées à titre accessoire sont fournies par l'Administration des contributions directes, [...]. A défaut de ces données le Centre procède d'office aux estimations nécessaires à l'établissement de la cotisation. Il en est de même en cas de contestation relative à l'assiette cotisable, sous réserve de redressement éventuel. »

Dës Situatioun weist, datt d'Verrechnung vun de Sozialversécherungsbeitrëg (baséierend op enger initialer Estimatioun oder enger Adaptatiounsdemande déi de Versécherter proposéiert huet) no der Kommunikatioun vum aktuellen Akommes vun der ACD iwwerpréift ka ginn.

Wat d'Transmissioun vun den Donnéeë vun der ACD un de CCSS ugeet ass ervirzehiewen dat déi zwou Verwaltungen e reegelméissegem Echange hunn an dësen Echange och kontinuéierlech verbessere wëllen.

Wat de Revenu selwer ubelaangt, ka just d'Steierverwaltung d'Donnéeën upassen, de CCSS ka just bestëmmen op déi Revenuë sozialversécherungspflichteg sinn oder net. Wann d'Steierverwaltung den deklaréierte Montant korrigéiert, mécht de CCSS dann déi retroaktiv Berechnung op Basis vun den Deklaratioune vun der Steierverwaltung.

Wann den Assuré net averstanen ass mam Decompte muss en säi Solde regléiere souwéi et am Artikel 428, Alinea 1 virgesinn ass.



Dësen Artikel gesäit vir dat de Paiement muss gemaach ginn, och wann een e kontestéiert. Am Kader vun enger selbstänneger Aktivitéit ass de kontestéierte Montant deen, dee, vun der ACD kommunizéiert gëtt an net d'Rechnung vum CCSS.

An dem Fall ass der concernéierter Persoun geroden d'ACD ze kontaktéiere fir datt se, wann néideg, kann de Montant vum Revenu deen dem CCSS matgedeelt gouf ajustéieren. Wann d'ACD der Meenung ass, datt d'Kontestatioun déi d'Persoun eragereecht huet begrënnt ass, mécht se eng Rektifikatioun. Duerno kann dann de Betrag, deen dem CCSS ursprénglech matgedeelt gouf ugepasst ginn an dee Montant deen ze vill bezuelt ginn ass gëtt dann un déi betraffe Persoun rembourséiert.

De CCSS fänkt eréischt un d'Scholden anzedreiwe wann den Debiteur sech net mellt a seng Schold net zeréckbezilt an dat och nëmmen no enger Verspéidung vu 6 Mensualitéiten. Am Fall wou de Geriichtsvollzéier schonn abezu gouf an dëst op e Feeler vum CCSS geschitt ass, zitt de CCSS de Geriichtsvollzéier zeréck an iwwerhëlt och déi ganz Käschten.

Lëtzebuerg, den 17. Januar 2023

De Minister fir sozial Sécherheet

(s.) Claude Haagen